

Inuiaqatigiittut inuttullu ingerlariaqqinnissaq siunertaralugu, nuna tamakkerlugu tamanut tarnikkut katsorsartinnissamut oqaloqateqarnissamullu neqeroorutit annertusarneqartariaqarneri pillugu inatsisartunut apeqquteqaat aallaavigalugu oqallisissiasatut siunnersuut.

(Inatsisartunut ilaasortaq Knud Kleemann, Atassut)

Akissuteqaat

(Meeqqanut, Inuusuttunut, Ilaqutariinnut Nunamullu Namminermet Naalakkersuisoq)

Siullermeerneqarnera

Inatsisartunut ilaasortaq Knud Kleemann, Atassut, sammisamut pingaarutilimmut oqaluuserisassanngortitsisimagavit qujanaq.

Eqqarsartaatsikkut peqqissutsimut atugarissaarnermullu tunngatillugu ukiut, inuunermi inissisimaneq imaluunniit sumi najugaqarneq apeqqutaatinnagit innuttaasunut tamanut ikiuisinnaasoqassasoq Naalakkersuisut isumaqatigilluinnarpaat.

Tamannarpiarlu pissutigalugu Inulerivik oktobari 2025-mi ammarneqarpoq, tassani innuttaasut innersuussinertaqanngitsumik saffiginnissinnaapput nunamilu sumiluunniit najugaqaralarunik katsorsartissinnaallutik. Tamatuma tarnikkut tapersersuinissaq ajornannginnerulersissimavaa atorfissaqartitsisunullu tigussaanerulersimalluni.

Inunnut assersuutigalugu atornerluinermik, meeraanermi atornerlunneqarnerup malitsigisaanik kingunerlutsitsinermik kiisalu ataatsimut isigalugu atugarliornermik qaangerniagalinnut arlalinnik neqerooruteqareerpugut. Kisianni inuiaqatigiittut anniaatit tarnikkullu unammilligassat pillugit ammasumik oqaluuserinnissinnaanissarput peqatigisaanik pingaaruteqarpoq. Eqqarsartaatsikkut ingerlalluarneq ataasiakkaat unammilligassatut isigineqarsinnaanngilaq. Tamanna ataatsimoorussamik akisussaaffiuvoq.

Atugarliornerit, atornerluinerit, innarliinerit imminullu toqunnerit ajortumik piujuarnerisa kipitinnissaat pillugit Naalakkersuisut aaqqissuussaasumik pinaveersaartitsinermik siunnerfeqarlutik suli sulissuteqarput.

Taamaammat tarnikkut katsorsaannissamut oqaloqateqartarnerillu nuna tamakkerlugu neqeroorutaanerat annertusinissaannut pisariaqartitsineq eqqartuleraangatsigu piginnaassutsit annertusineqarnissaat pineqaannarneq ajorput; katsorsaannissamut neqeroorutit inuiaqatigiittut patajaatsumik tunngavimmeeqataalernissaasa qulakkeerneqarnissaat pineqartarpoq.

Siusissukkut tapersersuineq, imigassaq aalakoornartortalik pillugu politiki nutartigaq akisussaassusilillu, ineqarnermut atugassarititaasut toqqissisimanartut aalajaatsullu, ulluunerani paaqqinnittarfiit pitsaasut meeqqallu atuarfiat ingerlalluortoq tamarmik tassaapput inuup pitsaasumik ineriartorsinnaanissaanut qitiusumik inissisimasut sinaakkutinillu pilersitsisut. Sinaakkutit taakkua atugarissaarnissamik, imminut naleqartinnermik, neriunnermik inuunerullu isumaqarneranik misiginissamik periarfissiisuupput.

Taamaammat inuiaqatigiittut aaqqissuussaasumik pinaveersaartitsineq annertunerusumik siunnerfiginerullugu sulissuteqarnissarput pingaaruteqarluinnarpoq.

Tamanna suliniutaavoq amerlanerusunut pitsaasunik toqqaasinnaalersitsisoq, peqatigisaanillu pissutsinik pilersitsisuulluni, tassani tarnikkut katsorsaanerit oqaloqatigiittarnerillu tamakkiisumik ingerlanneqarsinnaanngorlugit, inuillu ataasiakkaat inuiaqatigiillu ineriartornerannut tuniseqataalluni.